



# Канон святителю Иоанну, митрополиту Тобольскому

Миняя, 10 Июня, Канон святителю

Глас 1

## Песнь 1

**Ирмос:** Песнь победную поим вси Богу, / сотворшему дивная чудеса мышцею высокою / и спасшему Израиля, / яко прославися.

**Припев:**

Слове Божий, / помози ми достойно воспети чудотворца Сибирского, святителя Иоанна, / мойя прегрешения презирая и подавая мудрость сердцу и устам моим.

**Припев:**

Был еси, святителю Иоанне, юноша благочестив, / родителем утешение, книжному учению прилежен, / умудряя разум свой высокими познаниями / и к Господеви всем сердцем прилепляяся.

Слава Отцу и Сыну и Святому Духу.

Глубокия веры причастник был еси, преподобне, / егда, обучая юношей, / стремление ко Господу в сердцах их мудро пробуждал еси, / наставляя их вся обращати во славу Господа.

И ныне и присно и во веки веков. Аминь.

**Богородичен:** Пресвятая Дево, / со святителем Тобольским Иоанном / молися к Сыну Твоему, Господу нашему Иисусу Христу, / да подаст нам оставление прегрешений наших и от всяких бед спасет.

## Песнь 3

**Ирмос:** Камень, егже небрегоша зидущии, / сей бысть во главу угла: / Той есть Камень, / на немже утверди Церковь Христос, / юже от язык искупи.

**Припев:**

Киево-Печерская Лавра всецело плени тя, святителю Иоанне, / и в сердце твоём возгорется огонь: / мир и яже в мире оставити / и во иночестем звании Богу послужити.

**Припев:**

Умудрил еси, святителю Божий, разум твой велением слова Божия / и, в звании иеромонаха быв, / явил еси великия таланты в проповедании слова Божия / и народную любовь стяжал еси.

Слава Отцу и Сыну и Святому Духу.

Братию Лавры умилял еси, святителю, / егда в пути иноческого жития своего / всею душею предавался еси усиленным молитвенным подвигом, / усердному и постоянному посещению

служб церковных/ и воздавал еси славу Богу,/ тако о тебе благоволившему.

И ныне и присно и во веки веков. Аминь.

**Богородичен:** О, Мати Божия!/ Твоими всецельными мольбами содейлай нас подражатели жития святителя Иоанна,/ да и нашим житием славится Бог,/ в Троице Святей почиваяй.

#### **Седален, глас 4**

Болящу ти, святителю Иоанне, и на одре смертном лежащу,/ явися тебе святитель Феодосий и повеле тебе:/ служи заутрие, и здрав будеши./ Нимало же усумневся во обещании,/ ты повелел еси вся приготовить к твоему служению во храме,/ и, милостию Божиею совершив в полном здравии Литургию,/ своему Небесному целителю составил еси похвалу,/ и всем людем возвестил еси чудодейственную тебе помощь святителя Феодосия.

Слава Отцу и Сыну и Святому Духу, и ныне и присно и во веки веков. Аминь.

**Богородичен:** Бога, из Тебе воплотившагося, разумехом, Богородице Дево,/ Того со святителем Иоанном моли/ спастися граду нашему Тобольску/ и всей стране Сибирстей.

#### **Песнь 4**

**Ирмос:** Духом провидя, пророче Аввакуме, Словесе воплощение,/ проповедал еси, вопия:/ внегда приблизится лето - познаешися,/ внегда прийти времени - покажешися./ Слава силе Твоей, Господи.

#### **Припев:**

Добре подвизался еси, святителю, во святей Лавре,/ молитвенное уединение содела ты избранным сосудом благодати Божественных,/ и, познав твое чистое в монашестве житие,/ святитель Черниговский Феодосий призвал тя в Чернигов,/ и в сан архимандрита возводит,/ и Елецкую обитель во управление тебе поручи.

#### **Припев:**

С любовью и добрым послушанием работал еси, святителю Иоанне, святителю Феодосию,/ по блаженней же кончине его/ народом православным избран был еси преемником его святительского служения/ и Святейшим Патриархом Адрианом рукоположен был еси в архиепископа Черниговского.

Слава Отцу и Сыну и Святому Духу.

Яко светильник светлый, на высоте архиерейского престола поставленный,/ ты, святителю, своими великими добродетельми снискал еси великую любовь паствы твоея./ Дай и нам, грешным, молитвами твоими свет Христов жизнью своею являти/ и быти образом для всех, спасения ищущих.

И ныне и присно и во веки веков. Аминь.

**Богородичен:** Моли, Пречистая, Бога, без семени от Тебе рождаемого,/ да управим житие свое ко благоугождению Господу/ и в любви к братьям нашим.

## Песнь 5

**Ирмос:** Твой мир даждь нам,/ Сыне Божий:/ инаго бо, разве Тебе, бога не знаем./ Имя Твое именуем,/ яко Бог живых и мертвых еси.

### Припев:

С великою печалию Черниговския духовныя дети твоя/ провождаху ты, святителю, в град Тобольск,/ но обители Тобольска радостно сретоша тебе,/ яко вестника мира и учителя благочестия./ Ныне же вся Сибирь благоговейно совершает память твою и молится тебе,/ да оградиши миром всю землю сию/ и в Царствие Божие введёши молящихся тебе.

### Припев:

Святителю Христов!/ весь досуг свой ты посвящал еси составлению книг душеполезных,/ и чада твоя духовная, питаются ими,/ о мирском попечении оставляху/ и устремляхуся к получению вечнаго блаженства.

Слава Отцу и Сыну и Святому Духу.

Кто может изобразити твоё, святителю благостный, нищелюбие,/ твоя тайныя посещения обиталищ бедных,/ твоя беседы с заключёнными?/ Научи и нас не для себе жити,/ но и о бедных помышляти и страждущих посещати,/ да получим благословение от Господа.

И ныне и присно и во веки веков. Аминь.

**Богородичен:** Святитель Иоанн святую икону Богоматере, сияющую чудесы,/ дарова граду Тобольску,/ да вернии людие прославляют чудное заступление Богоматере/ и молитвы своего святителя.

## Песнь 6

**Ирмос:** Пророка Иону подражая, вопию:/ живот мой, Блаже, свободи из тли/ и спаси мя, Спасе мира, зовуща: слава Тебе.

### Припев:

Благовествование твоё истин Евангельских,/ благоговейное совершение Богослужений,/ кротость и смирение/ стяжаша тебе нежную и святую любовь народную:/ поминай и нас, грешных, у Престола Царя Славы/ и даждь нам не о временном пещися,/ но о приобретении благ Царствия Небеснаго.

### Припев:

Вдовы, и сироты, и вси беднии обитатели Тобольска/ воистинну видеша в тебе отца своего/ и, получающе от Тебе помощь, прославляху Господа,/ единого милосердия Учителя.

Слава Отцу и Сыну и Святому Духу.

Ты, святителю, наипаче делом и всею своею жизнью/ учил еси всех жити по Христову Евангелию./ Твоими молитвами содейай и нас неленостными исполнителями Евангельских заповедей,/ да с тобою сподобимся во веки в райских обителях прославляти нашего Спасителя.

И ны́не и прѣсно и во ве́ки веко́в. Ами́нь.

**Богородичен:** Усе́рдная Моли́твеннице на́ша,/ прѣзри на на́ша стенáния,/ болѣзни на́ша исцели́,/ грехо́в брѣмя разреши́,/ любóвь к Бо́гу и бра́тиям в се́рдца на́ша всади́,/ да, избáвльшеся от злых, прослáвим Тебѣ́,/ Виновни́цу на́шего спасéния.

## Кондак, глас 2

Явил́ся еси́ во тьме́ неведéния пребывáющим просвети́тель,/ вдов и сирóт утѣшителъ,/ дивный врач немо́щствующих,/ младéнцев и отроко́в наста́вник,/ родителем же пресвѣтло́е ра́дование,/ святи́телю о́тче Иоáнне,/ моли́ Христа́ Бо́га подáти странé нашей в вѣре утверждéние,/ во́инству на́шему на врагѣ́ побéду и одолéние,/ лю́дем же своѣ́м ве́лию ми́лость.

## Икос

Блаже́нна кончи́на тво́я, святи́телю:/ по Божѣ́ственной Литурги́и пита́я дру́ги сво́я, с ни́миже трудѣ́лся еси́, и ни́щих,/ ты сам трапéзы не вкуша́л еси́,/ но по о́бразу Спаси́теля, был еси́ я́ко служа́й:/ крóтко бесѣдовал еси́ со своѣ́ми детьми́ духо́вными,/ к вѣ́черу же, удалѣ́вшись в сво́ю моли́твенную кѣ́ллию,/ в моли́тве излива́л еси́ ду́шу сво́ю пред Го́сподем и Пречи́стою Богоро́дицею/ и колéнопреклонéнно прѣдал ду́шу сво́ю Го́споду./ Сего́ ра́ди мы вси со умилéнием взывáем ти:/ о вели́кий святи́телю!/ умоли́ Го́спода и нам подáти кончи́ну непосты́дную/ и всем, живúщим в ми́ре, вѣры укреплéние,/ в до́брых дѣ́лах утверждéние,/ да получѣ́м от Христа́ Бо́га ве́лию ми́лость.

## Песнь 7

**Ирмос:** Сýщим в пещи́ отроко́м Твоѣ́м, Спа́се,/ не прикосну́ся, ниже́ стужи́ о́гнь./ Тогда́ триé, я́ко еди́ными усты́, по́яху/ и благословля́ху, глаго́люще:/ благословéн Бог о́тец на́ших.

### Прпиев:

Возлюби́л еси́, святи́телю, просвещéние духо́вное:/ и в Черни́гове, и во гра́де Тобóльске усéрдно обуча́л еси́ б́дущих па́стырей,/ сам посеща́я шко́лу,/ и учи́л еси́ наста́вников и питóмцев шко́лы взывáти Го́споду:/ благословéн Бог о́тец на́ших.

### Прпиев:

Кто не восхва́лит па́стырския труды́ тво́я, сибѣ́рский моли́твенниче,/ кто не восхва́лит твоегó попечéния о язы́чницех Тобóльскаго кра́я,/ кто не удиви́тся твоему́ руково́дству па́стырей Цѣ́ркви в проповѣ́дании сло́ва Бо́жия/ и в непрестáнной восклицáнии Го́споду:/ благословéн Бог о́тец на́ших.

Слáва Отцú и Сы́ну и Свято́му Ду́ху.

И при жи́зни тво́ей/ стра́ждущии и боля́щии утешéние и исцелéние от Тебѣ́ получа́ху,/ по блаже́нней же кончи́не тво́ей ко грóбу твоему́ прибега́ху,/ и благодáтную по́мощь ты, святи́телю, обильно́ источáл еси́,/ да вси благодарно́ воспева́ют, глаго́люще:/ благословéн Бог о́тец на́ших.

И ны́не и прѣсно и во ве́ки веко́в. Ами́нь.

**Богородичен:** Приклонѣ́йся на́шим мольба́м, Чи́стая Богороди́тельница,/ моли́твою ми́лостивно подвѣ́гнися к Бо́гу/ и Сего́ ми́лостива сотвори́ нам,/ на Тя, Блага́я, прѣсно надéющимся и

взывающим:/ благословен Бог отец наших.

## Песнь 8

**Ирмос:** Песнословцы в пещи спасаго дети/ и громопламенную предложшаго на росу,/ Христа Бога пойте и превозносите во вся веки.

### Припев:

Глас народный - глас Божий по кончине твоей, блаженне,/ именоваше тебе, святителю, милостивым чудотворцем/ и Господу, даровавшему тебе благодать исцелений, зываше:/ Христа Бога пойте и превозносите во вся веки.

### Припев:

В знойное летнее время скончался еси, святителю Божий,/ и тело твоё долгия дни пребысть без погребения,/ дондеже блаженный Филофей из миссионерского странствования не возвратися,/ и, видя нетленным твоё тело, зываше:/ Христа Бога пойте и превозносите во вся веки.

### Припев:

Устремляхуся ко гробу твоему, святителю Иоанне,/ вси, душею страждущи и грехи обремененнии,/ и, твоим молитвенным заступлением благодатную от Господа помощь получивше, радостно зываху:/ Христа Бога пойте и превозносите Его во вся веки.

Слава Отцу и Сыну и Святому Духу.

О велице дерзновении твоём пред Богом свидетельствовашу вернии/ и, повествуяще о твоём мощнем предстательстве,/ всех учаху Спасителю восклицати:/ Христа Бога пойте и превозносите во вся веки.

И ныне и присно и во веки веков. Аминь.

**Богородичен:** Бездна последняя обыде мя безмерных прегрешений/ и во глубину низводит мене лютаго отчаяния./ Родшая бездну милосердия, ускори и спаси мя,/ да из глубины сердца вопию:/ Христа Бога пойте и превозносите во вся веки.

## Песнь 9

**Ирмос:** Светоносный облак,/ в оньже всех Владыка,/ яко дождь с небес на руно, сниде/ и воплотися нас ради,/ быв Человек, Безначальный,/ величаем вси яко Матерь Бога нашего Чистую.

### Припев:

О святителю Иоанне,/ моли Господа и Пречистую Его Матерь/ даровати всем нам силу,/ Господа от всея души и всего сердца любить/ и Имя Его Пречистое славити и воспевати:/ слава Господу, давшему святителю крепость,/ слава Господу, чрез святителя благодатно нам помогающему.

### Припев:

О, коли́ка чудес твои́х си́ла! О, коли́ка назидате́льна жити́я твоего́ све́тлость! Ка́ко, земна́я  
вся оста́вив,/ на Небеси́ несказанным блаже́нством наслажда́ешься,/ не забуди́ нас в твои́х  
святы́х моли́твах,/ дивный святите́лю.

Сла́ва Отцу́ и Сы́ну и Свято́му Ду́ху.

О вели́кий сибирский святите́лю Иоа́нне, митрополи́те Тобо́льский,/ грешных на́шу моли́тву  
приими́/ и оте́чество твое́ в ми́ре сохрани́,/ земна́я бла́га не отыми́ от нас/ и упрáви пу́ть наш к  
Ца́рству Небе́сному.

И ны́не и при́сно и во ве́ки веко́в. Ами́нь.

**Богородичен:** О Пресвята́я Де́во! При сво́ей жи́зни святите́ль Иоа́нн/ усердно сво́я излива́ше  
моли́твы пред чудотво́рным Твои́м о́бразом,/ ны́не же на Небеси́ созерца́ет сла́ву Твою́/ и  
слы́шит моли́твы Твоя́ о всем ми́ре./ Со святите́лем Тобо́льским моли́ся, Пренепоро́чная, о  
стране́ Сибирсте́й/ и упрáви пу́ть наш к Небе́сному Ца́рствию.

## **Светилен**

Святите́ль Тобо́льский и моли́твенник все́я страны́ Сибирския́/ днесь Це́рквию прославля́ется,  
я́ко му́дрый упрáвитель церко́вный,/ я́ко милосе́рдия о́браз, я́ко святите́лей украше́ние.

Сла́ва Отцу́ и Сы́ну и Свято́му Ду́ху, и ны́не и при́сно и во ве́ки веко́в. Ами́нь.

**Богородичен:** Седмосве́тлый Тя све́щник,/ о́гнь Богоразу́мия нося́щ, Отрокови́це, проро́к  
древле прови́дя,/ светя́щ во тьме́ неведе́ния бе́дствующим,/ те́мже вопие́м Ти, Всенепоро́чная:/  
со святите́лем Иоа́нном моли́ся дарова́ти нам свет ра́зума,/ дух прему́дрости и просвеще́ние  
очесе́м се́рдца на́шего/ к позна́нию Еди́наго Бо́га на́шего.